

CONCIERTO DOMINICAL “Donny Laclé” diadomingo awor dia 29 di April cu “Homenahe na Padu”

STA. CRUZ -- Manera nos a anuncia luna pasa, e Concierto Dominical “Donny Laclé” di e luna aki ta dedica na Juan Chabaya “Padu” Lampe, nos gran compositor Arubiano, cu ta cumpli 87 aña dia 26 di April.

E concierto aki ta tuma luga diadomingo awor, dia 29 di April, na Manchebo Beach Resort, e biaha aki no den The French Steak House, sino den The Pavilion, e gazebo grandi banda di beach.

Bao di direccion di “Bartholomeus “Roy” Sneek “Orkesta Homenahe na Padu

Lampe”, specialmente forma pa e evento aki, tin sigur dos luna caba ta ensaya pa presenta algo unico como regalo pa Padu.

For di cuminzamento di e Conciertonan Dominical Padu tabata presente, tanto personalmente como pianista y cantante, como den hopi di e piesanan presenta pa otro artista. Ta hasta asina cu su composicion “Abo so” a bira e himno di Concierto Dominical: den casi tur concierto un of mas artista tabata cant’e of tok’e.

Den e programa di diadomingo awor tin hopi cantante conoci ta participa. Nos ta haya e

damanan Annette Wongsemito, Dayleen Dijkhoff, Erica Giel y Nilka Franka y e cabayeronan Percy Jeandor, Gilbert “Skerre” Arends, Robert Jeand’or y Roy Sneek.

Naturalmente tin hopi instrumento involvi. Riba trompet tin Fransheska Heinze, Eddy Ras y Michael Thodé. Lucio Rivadeneira ta toca saxofon alto y soprano, Anthony Giel ta toca trombon y Aryanne Daly ta toca dwarsfluit.

Bahista ta Mario Middendorp y percusionista ta Papito Rafael, Fio Wester y Micheal Winklaar. Y como pianista nos ta haya Albert Croes, Frank Sneek y

Danny Koolman.

Padu mes tambe lo toca un pieza, compañía pa e orkesta. Banda di tur e musiconan aki tin tambe 30 guitarista y 20 cuartista pa completa e orkesta. E repertorio di e orkesta aki ta consisti di bolero, tumba, wals, mazurka y danza, tur di Padu.

E organizadornan di Concierto Dominical ta gradici Roy y tur e musiconan cu voluntariamente y sin cobra ni un cen chikito a dedica hopi tempo den e ensayonan pa por presenta algo di kita sombre diadomingo awor. E concierto aki ta cumenza 11.00 or en punto y ta caba

13.00 or. Ta invita tur hende pa bin trempa pa haya un bon luga y pa no tin nod’i pone auto mucho leu. Ta spera un publico hopi grandi. For di 10.00 or e sound-check ta cumenza y p’esei ta pidi e musiconan tur pa ta presente no mas tarda cu 09.30 or. Henter pueblo ta bon bini.

Bin duna, hunto cu e orkesta special aki, Padu e homenahe cu e merece.

Entrada ta gratis manera semper, pero por contribui cu un donacion na e fondo di e ‘Fundacion pa Talento Musical Donny Laclé’; lo tin un caha special pa esey.